


DIARIO TA PRESENTA


VOZNAN DI PUEBLO

Bo ta kere cu introduccion di Taxi-Meter ta un bon idea?




Alejandro Koolman
Taxista (TX-87)

"Ningun momento e ta yuda na nada. Unico cos cu e ta bay haci ta perhudica turistanan, pa motibo cu ora di sali di aeropuerto ta dura casi un ora pa e sali yega hotel, y cu e prijs cu ta worde cobra ya nan ta keha caba. E negoshi ta pa Ben Willms so e ta, ya cu 400 taxi na \$60 pa luna ta bira \$24.000 p/ luna".




Julio Mathew
Taxista (TX-215)

"Ta un mal idea pasobra e ta bon costa e turista hopi placa ora cu e trafico ta druk. Y awor kier huur e taxistanan e meter, lo cual ta un abuso".




Jenny Raphaela
Gerente, sector turismo

"Si. E ta un bon idea ya cu e por trece un claridad y ahustacion den prijsnan di coremento di taxi sin cu ningun hende por reclama algo. Pero ta spera tambe cu e taxistanan cu ta traha duro por saca algo di esaki y no ser perhudica".



R.P. Vanterpool
Taxista (TX-146)

"No. E no ta bon idea ya cu e turistanan ta keha caba di prijs, y awor cu meter, cu e trafico pega e ta bay bira mas caro".



Feenis Frank
Fotografo

"Sigur cu si, pasobra asina ta kita e duda cu tin bez e consumidor tin cu e no a worde cobra honestamente. Ta pensa tambe cu mester tin dos tarifa caminda esun pa hendenan local ta mas barata".

Ainda Hulanda no a reconfirma cu Koolman lo keda Gobernador

ORANJESTAD (AAN): For di Hulanda no tin ningun informe oficial pa cu nombramento di Gobernador mr. Olindo Koolman. Pa algun siman caba unanimamente e colegio mas halto di nos Pais a para firme pa gobierno prolonga e nombramento aki di mr. Koolman.

Parce cu Hulanda lo ta tarda pa e reconfirma e nombramento aki. Kico lo tin tras di esaki te ainda no ta conoci.

Segun fuentenan cu Seguridad Nacional Hulandes lo por ta hungando un rol den henter e proceso aki. Un tempo gobernador a para firme contra di cierto funcionarionan cu kier dicta manera nan ta haya ta bon. Esaki segun informe tabata inaceptable, posiblemente lo por ta usa esakinan pa stroba su nombramento.

Nos ta biba den un tempo moderno y gobernador lo por tin su propio opion. Na Hulanda mes di parti di cas real tambe poco-poco ta worde teni bon cuenta cu nan opinionnan treci dilanti. Den curso di e dianan venidero lo por tin claridad relaciona cu prolongacion oficialmente di Mr. Koolman como gobernador.

SEMANA RANCHO!!

